

WACHUNGAJI WAZAWA NCHINI TANZANIA

Re-arranged and translated by Pastor Stephen Letta

Chacha Eliakimu Sando, (1940–2014)

Chacha Eliakimu Sando alikuwa mchungaji na msimamizi nchini Tanzania.

Maisha ya Awali na Familia

Chacha Eliakimu Sando alizaliwa Mei 30, 1940 katika Kijiji cha Mangucha, Wilaya ya Tarime, Mkoa wa Mara, Tanzania. Baba yake alikuwa Samwel Sando Mahanga, na mama yake alikuwa Rhoda Waisiku. Chacha Eliakimu Sando alikuwa mzaliwa wa kwanza kati ya watoto wanane. Alizaliwa katika ukoo wa Abhairege wa kabila la Kuria. Sando alikulia katika Kijiji cha Mangucha, Wilaya ya Tarime, Mkoa wa Mara, Tanzania.

Kati ya miaka ya 1950 na 1956 Sando alisoma shule ya msingi ya Nyansincha, Kibumayi na shule ya kati ya Ikizu. Mnamo 1956, Sando alibatizwa akiwa bado mwanafunzi katika shule ya kati ya Ikizu. Baadaye alisoma katika chuo cha Misheni cha Waadventista cha Bugema nchini Uganda kwa elimu yake ya sekondari. Alipata shahada katika vyama vya ushirika nchini Ujerumani na diploma katika uhasibu na ukaguzi. Pia alipata diploma katika mafunzo ya uchungaji.

Ndoa

Chacha Eliakimu Sando alifunga ndoa na Deborah Rhobi Mwita mnamo 1963, katika sherehe ya harusi iliyofanyika katika kijiji cha Manguncha. Walibarikiwa kuwa na watoto saba, kati yao watano walifikia utu uzima ambao ni: Chatele Mwita, Anna Maseke, James Mahanga, Jacqueline Gati, na Enoch Marwa.

Uchungaji

Kabla ya kujiunga na huduma ya uchungaji, Sando aliwahi kuwa mjumbe wa Bodi ya Taifa ya Uhasibu Tanzania. Aliwahi kuwa katibu wa Chama cha Ushirika Manguncha, meneja mkuu wa Tarime Famers Cooperative Union, na meneja wa Chama cha Ushirika Mara. Mnamo 1974 aliacha nafasi hii na kutumikia kama mhubiri wa kujitolea. Kiongozi mmoja aliyehudumu pamoja na Sando alishuhudia kwamba alikuwa na dhamira thabiti na akili chanya kufikia malengo yake, bila kujali vikwazo katika njia yake. Angetembea umbali wa kilomita nyingi kutoka nyumbani kwake Mwanga mjini Kigoma hadi Shule ya Sekondari Kigoma ili kuwafundisha wanafunzi maarifa ya Biblia. Miongoni mwa wanafunzi hao alikuwa Bernard Mambwe, ambaye baadaye alijiunga na mafunzo ya uchungaji na hatimaye kuhudumu kama kiongozi wa kanisa. Mwaka 1976 Chacha Eliakimu Sando aliwahi kuwa mchungaji wa wilaya ya Mwanga, Kigoma, na mwaka 1978 Sando alitumwa Munanila kuhudumu kama mchungaji wa mtaa.

Kuanzia 1978 hadi 1981 Chacha Eliakimu Sando aliendelea na masomo ya uchungaji katika Chuo cha Tanzania Adventist Ministerial College, na kuhitimu stashahada ya uchungaji. Kuanzia 1981 hadi 1984 aliwahi kuwa mweka hazina wa seminari ya Ikizu na shule ya sekondari. Kuanzia 1984 hadi 1986 Chacha Eliakimu Sando alihudumu kama Meneja Biashara wa kwanza Mwafrika wa Idara ya Afya ya Tanzania Union.

WACHUNGAJI WAZAWA NCHINI TANZANIA

Re-arranged and translated by Pastor Stephen Letta

Idara ya Afrika Mashariki ilimchagua kuhudumu kama mkaguzi wa wafanyakazi wa kitengo hicho, ambapo alihudumu kutoka 1988 hadi 2003.

Maisha ya Baadaye

Chacha Eliakim Sando alistaafu utumishi mwaka 2004, na aliteuliwa kuwa mchungaji wa wilaya ya Njiro hadi 2006. Pia aliwahi kuwa mchungaji mstaafu wa ICTR Kisongo kama Chaplain wa wafungwa kwa miaka kadhaa, hadi alipougua sana. Chacha Eliakim Sando alifariki Septemba 10, 2014, Arusha, Tanzania. Maneno yake ya mwisho yalikuwa, “Atakuja kudai wake,” kwa Kiswahili “ Atakuja kuwachukuwa walio wake.” Alizikwa katika kijiji cha Kangariani, wilayani Tarime, mkoani Mara, Tanzania Septemba 15, 2014.